

Anuncio 7/2010: Actividades de campamento e campos de traballo (PR930A).

O pasado 7 de xaneiro de 2011 publicouse no *Diario Oficial de Galicia* nº 4, resolución do 29 de decembro de 2010, da Secretaría Xeral da Emigración, pola que se convoca e se regula para o ano 2011 o programa de axudas para a participación en actividades de campamentos e campos de traballo dirixidos a mozos e mozas de orixe galega ou descendentes de galegos e que residan no exterior.

A **finalidade** desta resolución é convocar as axudas correspondentes ao programa de actividades de campamentos e campos de traballo para o ano 2011, que ten por finalidade facilitar á mocidade da Galicia exterior o contacto coa realidade galega e o encontro cos seus familiares e aprobar as bases polas que se rexerá esta convocatoria e que se insiren no anexo I.

Esta resolución implica unha subvención en especie consistente no aloxamento nos campamentos ou residencias xuvenís, o traslado en parte ou na súa totalidade desde o seu país de orixe a Galicia e desde Galicia ao seu país de orixe, o traslado dos participantes desde o aeroporto de chegada en Galicia ata o albergue e o traslado desde o campamento ao aeroporto de regreso, segundo o disposto na disposición adicional terceira da Lei 9/2007, do 13 de xuño, de subvencións de Galicia, agás o disposto no punto sete do artigo dous da resolución. A concesión destas axudas se rexerán polo disposto no artigo 19º.2 da Lei 9/2007, do 13 de xuño, de subvencións de Galicia.

- 1) Actividades de campamento: convócanse 336 prazas en campamentos e albergues xuvenís situados en Galicia, dependentes da Dirección Xeral de Xuventude e Voluntariado da Consellería de Traballo e Benestar, en quendas do mes de xullo e agosto. Estas prazas distribuiranse conforme o establecido no anexo II.

O programa desenvólvese en quendas diferentes con actividades tamén diferenciadas:

- Na primeira quenda de xullo ten lugar a actividade Galiza: verde e azul, que busca proporcionar aos mozos e mozas de fóra de Galicia un mellor coñecemento da nosa terra; residirán os participantes -con idades comprendidas entre os 14 e os 17 anos- en dúas instalacións: seis días na zona de interior (no Camp. Xuv. Os Chacotes, Palas de Rei (Lugo) e seis días na zona de costa (no Albergue Xuvenil de Gandarío-Bergondo (A Coruña), permanecendo en tendas de campaña no primeiro caso e nun albergue, en cuartos compartidos, no segundo.
- Na segunda quenda de xullo, ten lugar o Programa Rutas coñece Galicia, a través dunha actividade de campamento itinerante, residindo os participantes -con idades comprendidas entre os 14 e os 20 anos- en instalacións de tipo albergue ou residencia xuvenil en cuartos compartidos. As instalacións están situadas nas distintas provincias galegas: en Lugo, a Residencia Xuvenil Eijo Garay; en Ourense, a R.X. Florentino López Cuevillas; en Vigo (Pontevedra), a R.X. Altamar, e en Bergondo (A Coruña), o Albergue Xuvenil de Gandarío.
- De ser o caso, convocarase unha terceira quenda para solicitantes de países nos que o seu calendario escolar, non permita participar na primeira quenda do mes de xullo.

- 2) Campos de traballo: convócanse 40 prazas en campos de traballo situados en distintas localidades da Comunidade Autónoma galega, de acordo co disposto no anexo II, para participantes con idades comprendidas entre os 18 e os 30 anos, en modalidades tales como: arqueoloxía, animación sociocultural, social, ambiental.

Serán **beneficiarios** desta axuda os mozos e mozas, que residindo fóra de Galicia, cumpran o seguintes **requisitos**:

- 1) Ter residencia habitual fóra de Galicia.
- 2) Ter nacido en Galicia ou ser descendente de galego ata o segundo grao de consanguinidade.
- 3) Ter nacionalidade española.



- 4) Atoparse vinculado con calquera concello galego no censo electoral de residentes ausentes, para aqueles solicitantes que teñan 18 ou máis anos á data de finalización do prazo de presentación de solicitudes.
- 5) Ter unha idade entre 14 e 20 anos, o 30 de xuño do ano da convocatoria, para os participantes en actividades de campamento.
- 6) Ter unha idade entre 18 e 30 anos, o 30 de xuño do ano da convocatoria, para os participantes en campos de traballo.
- 7) No caso dos solicitantes de actividades de campamentos non ter participado en edicións anteriores nesta modalidade.
- 8) No caso de solicitantes en campos de traballo non ter participado en edicións anteriores na modalidade de campos de traballo.
- 9) Para as prazas financiadas ao 100% da axuda do custo da viaxe, a unidade económica familiar destes solicitantes, non debe contar con ingresos superiores, en renda per capita, a 2.5 veces o salario mínimo interprofesional ou equivalente, de referencia para o ano da convocatoria, do país de residencia do solicitante, e os solicitantes residentes en Cuba, os ingresos non poderán ser superiores á prestación económica por anciandade establecida polo Estado español para o ano da convocatoria.
- 10) Para os solicitantes que opten a prazas financiadas ao 50% da axuda de custo da viaxe, poderán superar os límites de ingresos establecidos no punto anterior.

A documentación necesaria para solicitar dita axuda será a seguinte:

- 1) Solicitud conforme o modelo oficial que figura como anexo A desta resolución, optando unicamente por unha das modalidades (campamentos ou campos de traballo).
- 2) Fotocopia do pasaporte ou DNI do solicitante: os solicitantes que estean en posesión de DNI poderán prestar o seu consentimento expreso para que a Secretaría Xeral da Emigración comprobe por medio de acceso telemático a verificación dos seus datos de identidade, segundo o modelo que conste na propia solicitude. Para o caso de que non presten este consentimento deberán presentar fotocopia DNI e para aqueles solicitantes que non estean en posesión de DNI deberán presentar fotocopia do pasaporte.
- 3) Documentación acreditativa do nacemento en Galicia ou ascendencia galega ata o segundo grao de consanguinidade que inclúa documentación acreditativa do parentesco cando proceda.
- 4) Unha fotografía tamaño carné.
- 5) Certificación consular do solicitante, para acreditar a nacionalidade española e a inscrición no Rexistro de Matrícula como residentes, se estes extremos non quedan debidamente acreditados polo pasaporte.
- 6) Certificación ou xustificante acreditativo dos ingresos brutos, rendas ou pensión de calquera natureza que perciba o interesado e/ou membros da unidade económica familiar (ata o segundo grao de consanguinidade ou afinidade). No caso de imposibilidade de presentar esta documentación, poderá constituír documentación suficiente unha declaración xurada responsable (modelo no anexo C). Para estes efectos, entenderase por unidade económica familiar cando o beneficiario conviva con outra persoa unida a el por matrimonio, por unión de feito, ou por lazos de parentesco de consanguinidade ou afinidade ata o segundo grao.
- 7) Certificado médico conforme ao modelo oficial que figura como anexo D, de non padecer enfermidade infecto-contaxiosa e de ser apto para participar, con normalidade, en actividades recreativas e deportivas.
- 8) Declaración do beneficiario do conxunto de todas as axudas solicitadas ou concedidas por outras Administracións para a mesma actividade. A obtención desta axuda é compatible con outras para o mesmo fin, sen que, en ningún caso, a suma das axudas obtidas supere o 100% do custo da actividade. Declaración responsable conforme o solicitante está ao día nas súas obrigacións tributarias estatais e autonómicas, e da Seguridade Social, así como que non ten débedas pendentes coa comunidade autónoma.



- 9) Modelo anexo C, no que consten o número total de membros que compoñen a U.E.F. Aqueles membros que convivan co solicitante e non teñan ingresos económicos deberán xustificalo (certificación negativa do ANSES para os maiores de 18 anos) ou se non é posible, deberán entregar unha declaración xurada de que non perciben ingresos de ningún tipo.

Os solicitantes que foron admitidos a sorteo no último ano da convocatoria non terán que presentara documentación das letras: a), b), d).

- 1) Os solicitantes deberán achegar debidamente cuberto o anexo B desta resolución
- 2) Preferencia para o regreso en función da quincena en que vai participar.
- 3) Autorización para viaxar sos, asinada polos pais ou tiores legais, para os menores de idade.
- 4) Unha autorización asinada polos pais ou tiores legais para os participantes menores de idade que desexen quedar coa súa familia en Galicia ao rematar a actividade, indicando os datos dos familiares responsables que se farán cargo destes menores de idade.

O prazo de presentación de solicitudes será ata o **7 de marzo de 2011**.

Neste ámbito, como axente de emprego e desenvolvemento local do concello estou á súa enteira disposición nas oficinas municipais para atender a calquera dúbida ou consulta que lle poida xurdir e proporcionarlle a colaboración necesaria na tramitación das solicitudes que poida presentar ó abeiro desta orde.

Castrelo de Miño, 19 de xaneiro de 2011

A axente de emprego e desenvolvemento local


Mª Dolores Vázquez Araújo
CONCELLO DE
CASTRELO DE MIÑO